

Na osnovu člana 18. Zakona o poljoprivredi, ishrani i ruralnom razvoju Bosne i Hercegovine («Službeni glasnik BiH», broj 50/08), i čl. 17. i 22. stav 1. Zakona o Vijeću ministara Bosne i Hercegovine («Službeni glasnik BiH», br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na 85. sjednici održanoj 29.04.2009. godine, donio je

ODLUKU

O OSNIVANJU SAVJETODAVNOG VIJEĆA ZA POLJOPRIVREDU, ISHRANU I RURALNI RAZVOJ BOSNE I HERCEGOVINE

Član 1. (Osnivanje)

Ovom Odlukom, saglasno članu 18. Zakona o poljoprivredi, ishrani i ruralnom razvoju Bosne i Hercegovine („Službeni glasnik BiH“, broj 50/08), (u daljem tekstu: Zakon), osniva se Savjetodavno vijeće za poljoprivredu, ishranu i ruralni razvoj Bosne i Hercegovine (u daljem tekstu: Savjetodavno vijeće), kao stručno tijelo, u svrhu osiguranja efektivnih mehanizama konsultacije, učešća, koordinacije i legitimnosti donošenja odluka u sektoru poljoprivrede, ishrane i ruralnog razvoja.

Član 2. (Članovi)

(1) Savjetodavno vijeće ima 15 priznatih stručnjaka, uključujući predsjedavajućeg i dva zamjenika predsjedavajućeg.

(2) Članove Savjetodavnog vijeća čine:

- a) predstavnici relevantnih naučnih institucija:
 - Vjekoslav Selak,
 - Drago Bilandžija,
 - Nikola Mičić,
 - Vesna Milić,
 - Ferhat Čejvanović,
 - Ševal Suljkanović;
- b) predstavnici privatnog poljoprivrednog sektora:
 - Milan Lazarević,
 - Rasim Husić,
 - Novalija Tursunović;
- c) predstavnici poljoprivredne i prehrambene industrije:
 - Radovan Vukoje,
 - Milenko Crnjac;
 - Vedad Hadžimusić,
 - Đorđe Slavinjak;
- d) predstavnici nevladinih organizacija koje djeluju u sektoru.
 - Adem Zlotrg,
 - Vladimir Usorac.

Član 3.
(Imenovanje članova)

Članove Savjetodavnog vijeća, saglasno članu 18. stav (4) Zakona, imenuje Vijeće ministara Bosne i Hercegovine (u daljem tekstu: Vijeće ministara) na period od četiri godine.

Član 4.
(Mandat i zadatak)

(1) Savjetodavno vijeće ima mandat da daje mišljenja, preporuke i savjete Ministarstvu vanjske trgovine i ekonomskih odnosa Bosne i Hercegovine (u daljem tekstu: Ministarstvo) pri donošenju odluka, mjera, programa i drugih akata značajnih za oblast poljoprivrede, ishrane i ruralnog razvoja, a koje Ministarstvo razmatra.

(2) Savjetodavno vijeće ima zadatak:

- a) diskutirati o sektorskoj strategiji i politici u oblasti poljoprivrede, ishrane i ruralnog razvoja, kojim se određuju vizija i misija sektora, te predlaže pravce dugoročnog razvoja sektora;
- b) savjetovati odgovorne institucije vezano za sva pitanja koja zahtijevaju odluku o sektorskoj politici ili strateškim pravcima;
- c) davati mišljenja i preporuke za predložene propise, međunarodne sporazume i inicijative, te druga relevantna pitanja;
- d) analizirati sve izvještaje specijaliziranih tijela navedenih u Zakonu, uključujući nalaze sistema monitoringa i evaluacije Ministarstva, određenih članom 22. istog Zakona, i implikacije na predloženo preusmjeravanje mjera politike koje se primjenjuju u sektoru;
- e) osiguravati pravce za definiranje prioriteta u istraživanju i stručnoj obuci u području poljoprivrede, ishrane i ruralnog razvoja;
- f) razvijati smjernice za projekte i programe stručne obuke i istraživanja, u pogledu selekcije, implementacije, monitoringa i evaluacije u skladu sa sektorskim strategijama BiH.

Član 5.
(Poslovnik o radu)

(1) Način rada, izbor predsjedavajućeg i dva zamjenika predsjedavajućeg Savjetodavnog vijeća, pitanja o kojima se odlučuje konsenzusom i druga pitanja koja se odnose na rad Savjetodavnog vijeća uređuju se Poslovníkom o radu.

(2) Poslovnik o radu se donosi većinom glasova svih članova Savjetodavnog vijeća na konstitutivnoj sjednici.

(3) Predsjedavajućeg i zamjenike predsjedavajućeg biraju članovi Savjetodavnog vijeća između sebe na konstitutivnoj sjednici, a u skladu sa Poslovníkom o radu.

(4) Konstitutivna sjednica Savjetodavnog vijeća održava se najkasnije trideset (30) dana od dana stupanja na snagu ove Odluke.

Član 6.
(Saradnja)

(1) Savjetodavno vijeće će funkcionirati u saradnji s nadležnim ministarstvima entiteta i Brčko Distrikta Bosne i Hercegovine, te drugim relevantnim ministarstvima i institucijama, kako bi se efikasno ostvarili ciljevi iz člana 2. ove Odluke.

(2) Savjetodavno vijeće će uspostaviti saradnju i održavati konsultacije sa nadležnim organima oko međusobnih interesa u oblasti poljoprivrede, ishrane i ruralnog razvoja.

Član 7.
(Izvještaj)

Savjetodavno vijeće obavezno je Ministarstvu podnositi polugodišnji i godišnji izvještaj o radu, te postupati po svim pitanjima na zahtjev Ministarstva, Vijeća ministara i Parlamentarne skupštine.

Član 8.
(Uslovi rada i naknada)

(1) Ministarstvo osigurava uslove za efikasan rad Savjetodavnog vijeća, prema planu njegovog poslovanja.

(2) Članovi Savjetodavnog vijeća rade bez nadoknade, a troškove dnevnica, putovanja i smještaja snose organi iz kojih su delegirani.

Član 9.
(Stupanje na snagu)

Ova Odluka stupa na snagu danom donošenja i objavljuje se u „Službenom glasniku BiH“.

VM broj:...../09
Sarajevo,2009.godina

Predsjedavajući
Vijeća ministara BiH

dr. Nikola Špirić